

**STATEMENT OF ISSUES & COMMENTS OF THE APPLICANT AT THE  
PUBLIC HEARING FOR DEVELOPMENT OF SANITARY LANDFILL SITE FOR  
AIZAWL CITY UNDER THE NORTH EASTERN REGION CAPITAL CITIES  
DEVELOPMENT INVESTMENT PROGRAMME (NERCCDIP)**

**(In Mizo)**

**VENUE: Y.M.A HALL, ZEMABAWK, AIZAWL, MIZORAM**

**TIME : 17<sup>th</sup> June 2011; 1:00 P.M**

**Thuhma:**

India ram Sorkar laipui chuan hmarchhak bial ram ten ei leh bar lama hmasawna leh intodelhna nei turin hma a rawn la a. Sorkar chuan Asian Development Bank (ADB) chu pui turin a sawm ta a. Hemi bawhzui hian ADB chuan advisory technical assistance (ADTA) rawn tir in India ram hmarchhak bial te chu a rawn zir (sector study) chiang a, kum 2003 December thla khan zawhfel a ni ta a. Sector Study chuan hmarchhak ram bial pariat te vantlang khawsak phung leh ei leh bar dinhmun te zirchiangin infrastructure development programs kalpui dan tur te a duang ta a, inzirtir lam uar te, environmental leh khawtlang dinhmun chawikan te a tum ta a ni. Tichuan ADB chuan Project Preparatory Technical Assistance (PPTA) a ruahman ta a, he ruahmanna hnuaiiah hian a taka kalpui tu tur investment program North Eastern Region Capital Cities Development Investment Program (tuna NERCCDIP / Investment Program tih tak) chu a lo piang ta a. chu chuan heng hmarchhak bial ram panga Agartala (Tripura), Aizawl (Mizoram), Shillong (Meghalaya), Kohima (Nagaland), leh Gangtok (Sikkim) te hmasawna turin infrastructure leh services leh management ah te hma a la ta a ni.

North Eastern Region Capital Cities Development Investment Program (NERCCDIP) chuan hmasawna chenpakawm tak heng khawpui Agartala, Aizawl, Kohima, Shillong leh Gangtok te hian an neih theih nan urban infrastructure sectors lamah investments a ruahmanna kalpui a ni. NERCCDIP chuan kum 2010 atanga tan in kum ruk chhunga zawhfel turin bul a tan ta a , Asian Development Bank (ADB) hnuaiia Multitranché Financing Facility (MFF) in loan hmangin sum a tumsak ang.

He Vantlang Inrawnkhawm (Public Hearing) hi a ni leh hmun ruatah neih a ni a. Chairman Pu J. Hmingthanmawia, Additional Deputy Commissioner (ADC)-in inkhawm a kaihruai a, dar 1:20 P.M ah tan a ni. Minute 20-a tan tlai a nih chhan chu he hall-ah ian bialtu MLA hova khawtlang hruaitu inkhawm a awm vang a ni. Inkhawm kaihruaitu hian Public hearing neih a nihna chhan leh mipui hnena hriat tur pawimawh thenkhatte sawiin

he project-in a tuam tur ram zauzawng hi 72.42 Bigha a nih thu leh mi 7 ram lei a nih thu a sawi a. A hnuai mite hi Ram neitute hming leh an ram neih zauzawng ni a sawi te chu an ni.

| <u>Hming</u>      |   | <u>Ram zau zawng</u> |
|-------------------|---|----------------------|
| 1. B.Dawngliana   | - | 24.23 bigha          |
| 2. B.Bualchhuaka  | - | 8.85 bigha           |
| 3. Lalzawni       | - | 11.21 bigha          |
| 4. Ramzauvi       | - | 9.76 bigha           |
| 5. Lalchhawna     | - | 3.73 bigha           |
| 6. Lalrinmawia    | - | 10.91 bigha          |
| 7. J.Lalthlamuana | - | 3.73 bigha           |

He Vantlang inkhawma officials tel te mipui hnenah a hmelhriattir hnuin, Inkhawm kaihruaitu hian, Pi. P.C. Lalmuanpuui, AEE, Mizoram Pollution Control Board chu Vantlang Inrawnkhawmna koh a nih chhante leh a kal phung te sawifiah turin a sawm a. A ni hian inkhawm koh a nih chhante, Environmental Impact Assessment Notification-in a phut anga he vantlang inkhawm hriattirna Mizo leh saptawng chanchinbu-ah May ni 10 leh 11-ah te chhuah anih thu leh, hun tiam ni 30 chhunga dodalna emaw, rawt belh duh emaw Pollution Control Board-in a dawn loh thu a sawi. Tin, he inkhawmna-a thu leh hla zawng zawngte ziaka record vekin, a video te nen Ministry of Environment & Forests ah thawnthlak tur a nih thute a sawi a. Tin, public hearing-a chanvo neitu hrang hrangte mawhphurhna a sawi bawk. Hemi hnu hian Inkhawm kaihruaitu chuan Pi Lalzuimawii, EE, SIPMIU chu project chungchang sawifiah turin sawm leh a. A ni hian he project lo pian chhuah dan te, a hmun leh project kalpui a nih dan tur te, he project-in a nghawng tur zirchianna Environmental Impact Assessment Studies an lo neih dan te leh a thatna te a sawi a. Tin, tuna bawlhhlawh sawngbawl anih dan sawiin hetianga paihkhawm ringawt hi dan kalh a nih thu a sawi bawk.

Project chungchang ngaihthlak anih hnu hian Inkhawm kaihruaitu chuan mipui lo kalkhawmte chu an ngaihdan chi hrang hrangte zalen taka auchhuahpui ngam turin a chah a, ring tha taka sawi tura a ngen rualin thusawitu ten an hming, nihna leh veng hmingte sawi theuh turin a chah bawk. Tichuan, sawihonain zuiin; a hnuai mi ang hi sawihona tlangpui te chu an ni.

## **1. Pu K.Lalzidingliana, Tuirial Airfield VCP**

“Project hmun tur ram hi in lei fel tawh em? Zemabawk VCP hi ka zawt duh a, NOC a lo sign tawh em tih? Zemabawk ram hi Ek paih nan min hmang tawh a, kan nulate zawng zawng deuh thaw in thawhah an vei tawh a, nitina kan fehna hmun, thil chhia zawng zawng paih nana min hmang hi VCP ka nih angin rem ka tilo a ni”.

## **Chhanna: Pu Dunglema, Team Leader, Gherzi Eastern Ltd.,:**

“Aizawl-a piang leh seilian ka ni a, hetiang a Aizawl tana hmasawna tur lo awm hi tha hle in ka hria. Tuna kan bawlhhlawh paih dan hi siam that ngai a nih avangin tha zawka tih a lo ngai ta a. Sorkar laipuiin tha zawka tih a duh avangin Public Hearing hi neih a lo ngai ta ani. Landfill site naran a ni dawn lo a, Sanitary Landfill Site tur a ni a, tih thianglim tum a nih avangin a hlauhawm dawn lo a ni. Mithiam zir chhuakin a an siam tur, consultant-in a an puih tur a ni a, a tha tawkah ngaih tur a ni”.

*(Pu Dunglema, Team Leader hian project chungchang a sawifiah laia current a awm loh avangin power point presentation hmanga mipui hrilhfiah leh turin Pi Lalzuimawii, EE, SIPMIU chu sawm a.)*

## **Pi Lalzuimawii, EE, SIPMIU:**

“Tuna kan bawlhhlawh sawngbawl dan khu a tha lo em em a, dan kalh a ni hrim hrim bawk. Chuvangin mihring hriselna khawih pawl lo thei ang ber tura bawlhhlawh sawngbawl dan dang kan zawn a ngai ta reng a ni. Bawlhhlawh paihna hmun tur hi a lema kan hmuh ang hian bawlhhlawh tawih atanga insiam tui bawlhhlawhte hi mihring tana tha lo thei anih avangin pipe-in lak vek tur a ni a, lei chhunga a luh loh nan khur pawh HDPE- a thuah (lining) vek tur a ni. Pipe atanga tuchhia chu khwar siamin chutah chuan dawn khawm tur a ni a; chuta tangin bawlhhlawh vumah lak let (recirculate) leh tur a ni. Leachate a lo tam viau chuan khur HDPE-a thuahah tho kan dah leh ang a, kan pho ro ang. Tuna bawlhhlawh hal khu avanga in tawrhna hi kan hriatpui che u. Bawlhhlawh hal hian nasa takin hriselna a khawih pawl thei. Thawk lam harsatna mai bakah cancer thlengin a thlen thei. A bikin plastics lam chi hal phei chuan dioxin – cancer thlen thei tu a pe chhuak nasa hle. In tawrhna hi tawp tawh se kan ti. Tuna Landfill kan siam tur atanga pawh hian gas methan an tih chu a insiam dawn a, mahse chu chu lakhawmin boruaka pipe hmanga paih chhuah tur a ni ang a, a tam leh tam loh test reng a ni ang a, a tam tham viau chuan hal alh a ni ang”.

“Aizawl khawpui chhung tihthianghlim nan kan theihtawp kan chhuah a, mahse, SIPMIU eamaw consultant chauhvin emaw a tihlawhtling thei lo. Mipui thlawpna a pawimawh khawp mai. Awaeness pawh kan pe zel ang.”

## **2. Pu David C.Vanlalfakawma, (Research Scholar, MZU), Zemabawk**

“He project Aizawl khawpui tan pawh tha dawn hlein ka hria a, tihlawhtlin anih phei chuan a lawmawm hle ang. Amaherawh chu Awareness neih hmaa Public hearing neih hi a tih chi em ni? A kalphung in hrilh hriat hmasak phawt ni ta se. Hmanhnawh lova kalpui hi a tha ang”.

“Wet Rice Cultivation hi a thlang Damte luiah an siam mek a, an eizawna ber a ni a, Engangin nge a nghawng ang?”

“Tuna ka rawn din chhan ber chu tunah chuan Public Hearing hi dah tha rihin awareness campaign min neih pui phawt rawh u tih hi a ni”.

## **Chhanna: Pu Dunglema, Team Leader, Gherzi Eastern Ltd**

“Public Hearing hi mipui hnena inzirtirna pekna tura siam ani lo. Initial Environment Examination leh Draft EIA Report kan siam tawh a. (A thusawi lai hian a zawttu hian draft EIA report siam a nih laiin mipui remtihna in lak atul a lawm tiin a lo sawi baw). Public Hearing hi Environmental Clearance kan neihna atana pawimawh hmasa ber a ni tlat lawi si a. Kan sorkarah Environmental Clearance pe theitu kan neih rih loh avangin central sorkar kan dawr a ngai a, Chuvangin Public hearing hi buatsaih hmasak a ni. Awareness campaign hi neih mek a ni a, ward 19 zingah ward 3-ah neih a ni tawh a ni. Tin, hnathawh hma leh hnathawh lai pawhin Awareness campaign hi neih chhoh zel tur a ni baw”.

## **3. Pu K. Vanlalthanzauva, Zemabawk**

“Ka hma-a mi khan mipui zirtirna neih phawt chungchang kha a rawn sawi tawh a. Hetianga inzirtirna awm lo hi min palzut deuh niin ka hria. In sawi anga tih theih a nih chuan thil tha tak tur niin a lang a. Amaherawhchu a hma-a mi te ang khuan, ho lam deuha pawisa siam nan mai mai min rawng hmang ang tih ka ngaihtuah deuh rum rum. A bawlhhlawh tak pawh hi kan veng a lo thlen meuh chuan keini Zemabawk khawtlangte hian paihna tur a leng tawh. Ward 3-ah awareness kan tan tawh in ti a, a tuartute hnena awareness pe lova ward danga awareness campaign in tan hi min palzut deuh lo mo”?

#### **4. Pu J. Lalhimthanga, Zemabawk**

“Mipui zirtirna pe hmasa lova hearing neih hi a pawl hle in ka hria. Tawih thei leh thei lo dah hran tur a ni a, chumi tur chuan in zirtir fe a la ngai dawn a, thil buaithlak tak tur a niin ka hria. Plan ropui takin in siam a, a hlawhtlin tak tak a mimal chuan ka ring lo. Ek paihna tur an siam a, furah ek a chim hum huma, Zemabawk khua kuthnathawka lo nei nitina feh thin te tui tlan leh an inbualna ber a ni. Programme dang a fail zing tawh. Nangni pawh in nih ve tho ka hlau ani. Pollution hian engnge an thawh? Bawlhhlawh hal khu hi vawi tam ka complaint tawh. Lehkha kan hmu lo tiin min chhang ziah. Pawisa siam nana min hman ringawt hi tul ka ti lo. Tho a tam leh ang a, April, May ah chaw ei ta ula, tho a tam thei khawp mai, thosilen hnuai a chaw ei a ngai hial a ni. Vantlang ram nen a in hnaih lutuk deuh a ni. In plan chu a tha, mahse, a paihna hmun turah hian a leng chiah ang em? He hmun si rengin miin eizawn nan an hmang a, a tih chi meuh emaw chu? A hmun hi i sawn teh ang u. India ramah Highway bulah bawlhhlawh paihna an siam ka ring lo”.

#### **5. Pu Lalrindika, VC Member, Tuirial Airfield**

“Tunah ek an paih mup mup a, ek hi an paih reng dawn em? A khur a liam a, Damdiai luiah a luang lut reng a ni. He bawlhhlawh paihna hian kan veng a hnaih mah mah a, a sawn hlat leh theih a ngem? Bawlhhlawh sawngbawl dan thar tur hi system a fel hmel viau a, a tha chuan ka ring. Mahse bawlhhlawhrawn phurh thlak tur tho a ni a. In sawngbawl hma kha hun kha a awm dawn tho a, tho a pung dawn thoin ka ring. Tuna bawlhhlawh paihkhawmnah pawh hian tho a tam a, tho thahna an hmang a, kan khuh vak vak a ni. Kan hrisel lo em em a, kan chhungte khulai hmuna chengte pawh thih phah hial an awm tawh ani. Tho control-na tha deuhte hi awm thei ang em?” A enkawltu turte a ngai reng in ring dawn nge MR anga thawk turin a bul vel a mite in ruai thei ang em?

#### **Chhanna: Pi Helen Rodingliani, EE, SIPMIU**

“In lam tang kan ni kan ti tawp ang e. A hmunah pawh vawi tam kan en tawh a, Airfield VCP ngei pawh office-ah lo lengin kan in kawm tawh a. Tuna bawlhhlawh sawngbawl dan hi Ministry lam pawn tawp a ngai a ni tiin min hrilh fo va. Tih tawp angaih avangin ram changkang zawk te pawhin bawlhhlawh sawngbawl na atana an lo hman tawh ‘proven technology’ hmangin thlak kan tum a. Thlak a nih dan pawh nichinah khan kan ngai thla tawh a, kan tih dan tur chungchangah zawh duh kan la neih pawhin a englai pawh a la inzawh theih reng a ni. Tuna sawrkar laipui atanga kan mithiam lo kalte nen hian tukin zing ngeiah pawh a hmun kan tlawh a, an chek tlawk tlawk hial a ni. He lai hmuna awmte pawh

Asthma vei tawh leh chumi avanga thi tawh zatte an zawt bawk. Ministry atangin titawp turin min duh hle a ni. Public hearing kan neih mek hi Ministry atanga ToR kan hmuh anga Report kan siam chungchanga mipui ngaihndan lakkhawmna hun a ni. Kan kalpui dan hi a dik a. Hetah hian engkim record vek a ni a, Engkim in sawi hun a ni. Rawtna, duh loh dan, siam that tur zawng zawng in sawi hi siam that miah lohin Ministry ah thawn thlak vek a ni dawn a. Mipui duh loh danin project hi kalpui ani dawn lo a, ‘aw’ lo ti rawh u kan tihna a ni lo”. Sorkar plan hmasa –in mipui a ti beidawng tawh a, in rinlohna hi kan pawm thlap. In duh loh chhan kan lo chhinchhiah vek dawn a ni.

“Ek paih hi chu kalpui reng ani dawn lo a, Bethlehem Veng mawng ah ram lei a ni vek tawh a ni. Hei hi chu temporary measure chauh tur a ni e.

#### **6. Pu Lalthianghlina, Chairman, Local Council, Zemabawk**

“Hetianga project thar lo awm hi a lawmawm hle mai a, amaherawhchu, bawlhhlawh paih tawh dan chungchanga kan sawi zawng zawng hi a dik vek ani. Officer-te hnenah vawi tam kan sawiin kan hmu tawh a, rawtna vawi engngemaw zat siamin bawlhhlawh motor khuh turin vawi tam kan ngen tawh a, a sawt lo khawp mai. Ek paih chungchangah a that loh em avangin kan hlauthawng zo tawh a ni. A bul hnai leh Damdai lui bula eizawngtute hi a tuartu ber an ni a. Mipui inzirtir hmasak nise la. Nakin hnua tuna khawchhung hruaitute min la demna tur kha kan duh bik lo ani. Sipai ram luahin harsatna a siam hnem avang leh khaw bul hnai lui hrang hrangah harsatna a siam hnem vangin rin ngam a harsa a ni”.

#### **Chhanna: Pi Lalzuimawii, EE, SIPMIU**

“Tuna kan bawlhhlawh paih dan khu hmuh a hrehawm em em a ni. He project hlawhtlinna tur hian vawi tam tak a hmunah pawh kan kal tawh a, a hmaa mi hi tih tawp kan duh a ni”.

“Nichina zawhna he project hi khu lai area-ah khuan a leng dawn em mi tih chhanna kha chu a leng tura ngaih a ni. Bawlhhlawh hi thliar a ni dawn a, Motor khuhna nei lei vek tur a ni bawk. Boruak chhia hi a tam dawn lova. Hunbi fel taka kalpui a ni ang. A system thlak a ni dawn a, tuna Sorkar kalpui ang hi thlak vek a ni ang. Monitor reng tur a ni a, a concentration a san chuan a gas a kha hal alh tur a ni”.

“Public Hearing neih tur thu leh he project chungchanga rawtna, sawiselna neih theih hun chhung pawh thla khat hmalamah khan chhuah a ni tawh a, tuman Mizoram Pollution Control Board-ah leh SIPMIU-ah he project ngaihvenna leh complaint theh luh a awm lova, hearing hi kalpui a ni ta a ni”.

“Hna pek chungchang kha kan pe ang emaw kan pe lo ang emaw tiin sawi lawk theih a ni lo a, a chhan chu Aizawl Municipal Council-in an enkawl tur a nih vang a ni”.

“A siam dan chungchangah pawh Public grievance cell kan nei a. Rawtna leh sawiselna pawh a theh luh theih dawn a ni”.

### **7. Pu David C. Vanlalfakawma, (Research Scholar, MZU), Zemabawk**

“Slide No 6 sub no.(iv)-a Municipal Solid Wastes Management & Handling Rules 2000 a inziak, “Bio Medical Waste leh Industrial waste te Rules-in a hranpaa sawngbawl tur a tih angin tih ve leh tur” tih kha a sensitive viauin ka hria a. In zawm thei tak tak a ngem? In monitor thei tak tak angem? In tlin angem? Tih hi ka zawhna hmasa ni se”.

“Tin, a dawt leh ah chuan Disposal chungchangah khan Landfill-ah hian bawhhlawh tawih thei lo ho zawng leh incinerator-a kang ral lo zawngte paih a ni ang tih a ni a, tichuan EIA Report phok hnunung berah khan solid waste 30% vel a tawih ral thei a, 10-15% vel recyclable niin 50-60% vel chauh paih a ni ang tih a ni a. Chu chu, tun dinhmunah pawh hian a ni reng lo vem ni? Chuti a nih chuan leachate nasa takin a siam dawna, lei kha a ti hnawng viau dawn a ni. Chu chu engtin nge kan pumpelh ang?”

“Tin, kum engzat paih thei tura ruahman nge? Sihphir lama paih tur an phal loh avangin an paih tawh lo a, keini pawn kan complaint vet tho a, mahse engmah in ti lo, veng thenkhat in ngai pawimawh a, a then in ngai pawimawh lo a. In veng ngaih pawimawh Sihphir lamah paih zawk mai rawh u”.

### **Chhanna: Pi Helen Rodingliani, EE, SIPMIU**

“Nichina national highway bulhnai lutuk tih sawi awm kha - Landfill siam tumna khu highway atangin 1 km vel bamboo link road-a pheih khuan a ni dawn a. Sanitary Landfill a ni tawh dawn a, hmun rem tak a ni a, a mawngthlengin motor a kal thei dawn a, leia chhilh zel zel tur a nihavangin nakinah chuan khulai hmun khu Field lian tha taka chhuah tum a ni. Sihphir lamah khi chuan ruam a awm lova, Landfill siamna tur hian hmun dang remchang a awm tlat lo a ni. A hlawkna chu a bula miten an tel ngei ngei tur a ni. Bio-hazard lam chu kan khawih dawn lova, kan khawih tur chu Municipal solid waste chauh a ni. Damdawi lam thil chu Hospital chauhin an khawih ang. A kang ral bang, hlauhawm tawh miah lo chauh Landfill-ah hi chuan paih tur a ni.

“Awareness campaign hi kan kalpui mek a. Zaninah pawh Saron vengah kan nei dawn a. Amaherawhchu SIPMIU hian staff tlemte chauh kan neih avangin mipui kohkhawm a harsa

a, AMC Councilor-te kal tlangin heng campaign hi kan nei thin. Councilor kaltlanga mipui in kohkhawm phawt chuan, keini lam chu eng hunah pawh lo kal turin kan in ring reng e. Senso zawng zawng pawh kan rul leh vek baw ang”.

“Tuna bawlhhlawh paihna a thawk mek entir nan bawlhhlawh haitute khu kan ngai pawimawh hle. An hnathawh tur chu kan hotuten an ngaihtuah sak ngei ngei ang. Industry tenau siam turin plan pawh kan siam dawn a. A hlawkna chu a bul hnaia mi ten an tel ang.

“Tin, Landfill site life span tur khu chu kum 25 tura ruahman a ni”.

#### **8. Pu Lalchhuanmawia Hnamte, Teacher, Govt. Middle School, Zemabawk**

“Aizawl mamawh leh Mizoram mamawh a nih avangin a chhiatna lai awm thei zawng zawng ka’n thlir ve a. Helai veng hian thil thalo tak tak kan lo tawng tawh a, entirnan TB Hospital te ang te hi. Hetiang a lo nih tawh avang hian duh ngaihna a awm lo reng reng a ni. A bul vela mite eizawna tur tih kha ka ngaihpawimawh ber a ni. He thil hi a lo puitling pawh ni se, ka ngaihpawimawh tur chu eizawna an hmu em tih hi a ni dawn a ni”.

#### **9. Pi Lalzawni, Member, MHIP, Zemabawk Vengthar**

“A hlauhthawnawm zawng a thlir chuan a hlauhthawnawm a ni. Mahse hmasawna tur a nih dawn chuan tha ka ti. Eizawna mumal nei lo te’n hna an hmuh phahna tur a nih a, an project anga an kal chuan a tha dawn hle a ni”.

#### **10. Pu R.Keitawna, Tuirial Airfield**

“He project hi thil tha tak tak a nih dawn chuan tha ka ti a. Airfield bul lawk a cheng kan ni a, a paihna hmun ni lo vah bawlhhlawh an rawn paih thin a, hei hian tho pawh a ti tam hle a. Hei hi min khapsak thei a ngem? Motor number te lo chhinchhiah in in hnenah rawn theh lut ila hma min lo laksak thei a ngem?”

#### **Chhanna: Pi Lalzuimawii, EE, SIPMIU**

“Tuna mi i rawn sawi Airfield-a bawlhhlawh paih thin chungchang kha chu, bawlhhlawh paih hi UD & PA Department khawih a ni a, kan khawih a ni lo va, Municipal Council-ah complaint thehluh a tha ang”.



**11. Pu H.Lalzuala, Preseident, YMA, Zemabawk Branch**

“A chhia hi kan chang kan chang a, veng dangte hian chang zawk se kan thik lo khawp mai. Veng dang zawn hnua kan veng thlan a nihna chhan hi engnge ni? Khualzin leh Airfiled Venga mi ho an khawngaihthlak em em a. Heih mek lai hian kan hmanhmawh mah mah niin a lang. Amaherawhchu thil a kal thui tawh a, khulai bawlhhlawh hal khuk khu tih reh vang vang a ngai a ni. Mipui ho hian tuna in sawi zawng zawng hi a tak hmuh tur a awm lo ang tih kan hlauthawng a ni. Ek paihah harsatna kan tawk tawh a, insawi ang hi a thleng lo ang tih a hlauhthawnawm tawh a ni”.

**12. Pu Lalthianghlina, Chairman, Local Council, Zemabawk**

“Mi thiam tak tak in ni a, a hlauhawm theih dan min hrilh thung teh u?”

**13. Hming sawi lo**

“Hearing-ah hian in thu hi tihthluk in tum lui niin ka hria. Thu hi in lo ti tlu ringawt ang a, nakinah mipui thinrim in tawng palh ang tih a hlauhawm khawp mai. Thu ken sa neiin in rawn kal a, vantlang duhdan hi min ngaihven sak rawh u. Hearing hi nei nawn leh ang u”.

**Chhanna: Pu Dunglema, Team Leader, Gherzi Eastern Ltd.,**

“Thu titlu tura lo kal kan ni lo. Environmental Clearance neih nan Public Hearing hi conduct mai a ni. Thutlukna siam thei chu Ministry chauh an ni”.

**14. Pu Lalhmachhuan, President ,YMA, Tuirial Airfield Branch**

“Kan vengah bawlhhlawh leh ek in rawn paih a, hmun dangah paih ve tawh rawh u. Keini chuan kan tuar nasa tawh em mai. Dawrpui velah paih ula kan duh a ni. A rang lamin min sawn chhuahsak rawh u”.

**15. Pu K.Lalzidinglana , VCP, Tuirial Airfield**

“Khulaiah khuan rawn ti lo rawh u. A plan chu a tha, mahse, a site hi chu min sawn sak hram rawh u. Vengdangah min dah sak rawh u. Ek paihna pawh kan complaint- a, Scheme tha zawkin thlaktur an ti a, mahse engmah tih tak tak a awm chuang lo. Kan tuar reng tho. Tuna in thil duan pawh hi tha hle mahse a thawk tak tak tur contractor-ten an puitlin leh chuang lovang. Tuna bawlhhlawh paihna pawh khu leitha-ah chantir a ni ang tih a ni a, mahse tunah kum 20 hnuaah pawh engmah kan la hmu chuang lo”.

**Chhanna: Pu Dunglena, Team Leader, Gherzi Eastern Ltd**

“Sorkar in ring lo pawh hi a awm lo love. Mahse rin ngam hi a tha. Kein in kan duh loh in tu ten nge thawk ta ang! Sap emaw Vai emaw ai chuan Mizo kan tha zawk. Mizoram Pollution Control Board pawn Public Hearing chungchang hi newspaper leh Television kaltlangin an hriattir a, mahse kal kan tlem lutuk. He thil duhlo chauh kal khawm kan ang ka ti. Tunah Tuirial-ah bawlhhlawh paihna a awm ta sa sa, hemi hi i ti changtlung ang u. A nih loh chuan in tan a pawl thei zawk dawn a ni”.

**16. Pu K.Lalzidingliana , VCP, Tuirial Airfield**

“Hetiang in hauh ang chi hi chuan kan hmin lo telh telh ang”.

**17. Hming sawi lo**

“A lai takah thu la ang u. A thatna leh thatlohna te min hrilh rawh u tih pawhin min chhang baw si lo. Dah hrim hrim in duh avanga min nawr a ang riau mai. A hmun sawn mai ula, vaipa, sap pa rawih a ngai loving”.

**18. Pu David C.Vanlalfakawma , (Research Scholar, MZU), Zemabawk**

“Tawng dang kan hman ve lawk. “I am very shock to hear such a sarcastic remark from Chairman, Mizoram Pollution Control Board. In tan a pawl thei ang min tih kha min ti hel tu a ni. Kan hmin lo zo vek tawh. He thil hi zirchiangin vengchhung chanchinbuah te pawh lo chhuahin, veng mite rilru hneh lo tum ve nak alaiin min ti hel zo vek. He thil hian kan veng pal tlang lo mahse kan tuarna tur ka hre lo”.

**Pi Helen Rodingliani, EE, SIPMIU**

A hlauhawm theih dan te chu.

- 1) Bawlhhlawh hi phurh buak zawih zawih a nih chuan a hlauhawm.  
= Mahse Motor chungkhuh nei hman a nih dawn avangin phurh buak a awm thei lovang
- 2) Tui a ti bawlhhlawh thei  
=Hei pawh hi lining siam vek a ni dawna, tui a tihbawlhhlawh a rinawm loh
- 3) Gas a insiam thei a,a puak thei bawk.

= Pipe line in gas hi lakkhawm vek tur a ni a, a tam tham pheii chuan flare tur a ni ang.

**Tlangkawmna:**

Chairman-in a sawm angin he thutkhawmna thu tlangpuite Pi P. C. Lalmuanpuii, AEE, Mizoram Pollution Control Board-in a chhiar chhuak a, mipui atanga sawiselna a awm loh avangin chairman-in hming a ziaak a, Chairman-in lawmthu sawina a neih zawhah he vantlang Inkhawm hi a tiak ta ni.